


劉夢得文集



據中國國家圖書館藏宋刻
本影印原書版框高十九
九釐米寬十三·七釐米

劉氏文集

夢得

卷一至卷四

劉文房
集
劉夢得
文集
卷四

劉夢得文集卷第一

賦

大鈞賦

砥石賦

焚望賦

傷往賦

何卜賦

謫九年賦

望賦

山陽城賦

秋聲賦

大鈞賦并序

得一

始余失臺郎為刺史又貶州司馬俟罪朗州三見閏月
人咸謂數之極理當遷焉因作謫九年賦以自廣是歲
臘月

詔追明年自闕下重領連山郡印綬人咸曰美惡周必
復第行無恤歲杪其復乎居五年不得調歲二月有事
于社前一日致齋孤居慮靜滯念歛起伊人理之不可
以曉也將質諸神乎謹貢誠馳精敢問大鈞其夕有遇
寤而次第其辭以為賦

圓方相函兮浩其無垠
宵冥翕關兮走三辰以騰振孰
主張是兮有工其神迎隨不見兮強名之曰大鈞歌以
臨下兮藐乎雄尊天為獨陽高不可問工居其中與人
差近身執其權心平其運循名想象斯可以評曰嘻蒙



之未生猶泥耳落乎埏埴唯鈞所指忽然爲人爲大幸矣工賦其形七情與俱嗇智不授甲去聲之以愚坦坦之衢萬人所趨蒙一布武化爲長途人或譽平聲之百說徒虛人或排之半言有餘物壯則老乃唯其常否終則傾亦不可長老先期而驟至今否踰數而區量雖一失不獲兮亦大化之攸病謹薦誠上問兮俛伏以聽是夕寢孰夢遊乎無何之鄉抗陛級乎重宵兮異人間之景光中有威神巾金甲而燁煌鎮命之使前兮其音琅琅曰吾大化之一工也居上臨下廉其不平汝今有辭吾一以聽播形宵貌生類積意素笈音園音鎔鍊消息我之司智初不爾嗇不守以愚覆爲汝賦既賦汝形輔之聰明去求世師資適攸宜胡然抗志遐想前烈倚梯青

得一

二

頁舉足斯跌韜爾智斧無爲自伐鑿竅太繁矣和乃洩利淫前誘多逢覆輒名賜內煎外火非熱今哀汝窮將厚汝愚剔去剛健納之柔濡塞前竅之傷瘻兮招太和而與居貫以待人兮急以自拘道存邃奧無示而隅軋物之勢不作兮見傷之幾自無汝不善用吾焉嗇乎且夫身而騰氣者膺膺健而垂精者昊昊我居其中猶輪是蹈以不息爲體以日新爲道僂鱗音走灌莽苞阜乃牙乃甲乃殪乃剖陽榮陰悴生濡死藁各乘氣化不以意造賦大運兮無有淑惡彼多方兮自生醜好爾奚不德余以驟壯姑尤我以速老耶觀汝百爲又或不然赤子哇哇急其能言亦既名物幾時踰躓春耕其丘投種之日釋耒而歎何時粟實望所未至謂余舒舒欲其久

留謂我輩如我一子二誰之曲欤彼蒹葭之蒼兮霜霰
苦而中堅松竹之皴皴索籜兮不若拊筍之可憐納材
葦而構明堂固容消而力完揚且之哲兮不可以常然
當錫爾以老成蒼眉皓髯山立時行去敵氣與矜色兮
噤危言以端誠俾人望之侮黷不生爾之所得孰與壯
多不善處老問余而何受教而迴濛濛形開嚮之威神
孰爲來哉乃遽衣促盥端慮滌想委珮低簪持簿叩顙
而言曰楚臣天問不訓今臣過幸一獻三售始厚以愚
終期以壽忘上問之罪濯已然之咎心增故術腹飽新
授馳神清玄拜手稽首

砥石賦時在朗州

南方氣泄而雨淫地慝傷物嫗神噫濕渝色壞味雖金

得一

三

之堅亦失怕性始余有佩刀甚良至是澁不可拔剖其
室乃出朔陽眇眇傳刃蒙脊鱗然如瘡痂如黑子如青
蠅之惡銳氣中錮猶人被病然客有聞焉哀密石以遺
余沃之草腴雜以鳥膏切劑下上真質焯見躊躇四顧
道爾謝客微子之貽幾喪吾宝客曰吾聞諸梅福曰爵
祿者天下之砥石高皇帝所以礪世摩鈍有是耶余退
感其言作砥石賦

我有利金兮以利爲佩遭土卑而慝作兮雄芒爲之潛
晦如景昏而蝕既兮與肌漆而爲厲願秋蓬之不可荆
兮尚可遊乎隴駢之外利物蒙蔽材人惆悵俾百汰之
至精蟠一檢而多恙豈害氣之獨然兮將久不試而然
彼屠者之刃兮獵者之鋌不灌不淬兮揉錯銜鈿曰鼓

曰揮兮剗腹擊鮮覲燿燿以耀芒翁淫夷而騰羶豈不
涉暑而蒙沴兮鼎用之而成妍有客自東遺余越砥圭
形石質蒼色膩理刻其鱗皴滑以滌滄如衣澣垢如鼎
出否霧盡披天萍開見水拭寒焰以破昏擊清音而振
耳故態復還宝心再起旣賦形而終用一蒙垢焉何恥
感利鈍之有時兮寄雄心於瞪視嗟乎石以砥焉化鈍
爲利法以砥焉化愚爲智武王得之商俗以厚高帝得
之傑材以湊得旣有自失豈無因漢氏以還三光景分
隨道闊狹用之得人五百餘年唐風始振懸此大砥以
礪北民播生在天成器在君天爲物天君爲人天安有
執礪世之具而患乎無賢歟

楚望賦并序

得一

四

予旣謫于武陵其地故郢之裔邑與夜郎諸夷錯繫乎
天者陰伏陽驕是以繫乎人者風巫氣祲是已踳秀浮
浮利于樓居城之麗譙實鄰所舍四垂無蔽万景空入
因道其遠迹所得爲楚望賦云

翼輦之野祝融司方陰迫而專專實生沴天雷而零土
洩而泥氣罕淑清兮淫氣曠曠中人體支兮爲痿爲瘵
以曠滌煩兮利居高干物外我卜我居于城之隅死在
藩落麗譙渠渠四向垂空洞戶發樞眸子不運坐陵虛
無歲更周流時極慘舒萬象起滅森來貺予櫺軒之外
群山龍嵒岡陵靡阨勢若相拱出雲見怪窈蔚森聳露
夕霞朝望如飛動蒼廡之下大江傾洞支流合輪泄入
雲夢羲和望舒出没兩涵藩泳之族聳取咸呀秋水灌

盈流石飄沙流枿軒昂舞于盤渦遠及收潦澹如綠醪
白石磷磷倒影羅生蘋末風起有文無聲悠遠煙絲與
空蒼然湘沅之春先令而行臘月寒尺溫風發榮土膏
如濡言鳥嚶嚶三星曙其曉中植物颯以飄英雲歸高
唐草蔽洞庭目與天盡神將化并圓方相涵游氣杳冥
熙熙藹藹藻飾群形枿樹童丘積空疑青環州曲塘舍
景曜明恢台之氣發于春季涉夏如鑠逮秋愈熾土山
焦熬止水漢沸翔禽趾墮呀喙垂翅曠赫敲蒸陽極召
陰二儀交精下上相歆雲興天際歛若車蓋凝壚未瞬
弥漫靈靈雷出火喬木糜碎勢地勢空方夫皆廢懸
雷縵緹日中見昧移晷而收野無完塊少陰之中景物
澄鮮丹葉星房燭耀川原夕月既望曜于丹泉上鏡下

得一

五

水前塵濯煙宿麗潛芒獨行高躔皓一氣之悠悠潔有
形而溢清玄杳微明又斐齋想遊目於化先夜無朕以
徂征金霞暈乎海壖明星方楊斜漢西懸璿柄如墮半
沉曾瀾鷄喞嘶而晨鳴今日荏苒以騰晷動植瞭兮已
分山川鬱乎不平復人衆之誼卑洵浩浩以營營追向
時之景光不可驟得以再更意華胥之夢還猶仿像而
馳精日次于房天未降霜百卉猶澤水泉收咏故道駿
音宣 削衍爲廣斥水禽嬉戲引吭伸翮紛驚鳴而決起
捨綵翠于沙礫時時北風振槁揚埃簫條邊聲與鴈俱
來寒氛委積萬竅交激楚雲改容飛雨凝滴洒林遞響
浙瀝梢檝飛電照雪以騰光柔蔬傲霜而秀拚躔次殊
氣川谷異宜民生其間俗鬼言夷招二閻以成誣德伏

波而構祠投粃糗以鼓楫黍鱸鮓而如犧蟠木靚深孽
祆憑之祈年去癘蠲疴祗威繫鼓肆遑何勞水湄薦誠
致祝却略躩踞渚居蠹食大掩水物罟張餌啗不可道
伏頭幸潛緹晝撞夜觸設機沉深如拾于陸彼遊儵之
璅類咸跳脫於窘束雖三趾與六眸時或加乎一目亦
有輕舟軒輕泛浮拖綸往復馴鷗相逐暮夜澄寂嘯歌
群族僮音俚態幽怨委曲逗踈枿於江城引哀援於山
木巢山之徒扞木開田灼龜伺澤兆食而燔爨依起于
巖阿騰絳氣而警天重歎雨濡穎垂林巔盜天和而藉
地勢詠無勞而有年罷士閑人逸爲未作求全渚浹陶
汰澆滯流注瀆池繁光熠燿貪賈來貿發於懷握無翼
而飛潤于豐屋晒耕耘之悒悒徒胼胝以自鞠我處層

得一

六

軒日星迴還閱天數而視民風百變見乎其間非耳剽
以億說兮固幽求而縱觀觀物之餘遂觀我生何廣覆
與厚載豈有形而無情高莫高兮九閭遠莫遠兮故園
舟有楫兮車有輅江山坐兮不可越吾又安知其所如
况臨高以觀物

傷性賦并序

人之所以取貴於蜚走者情也而誕者以遺情爲智豈
至言邪予授室九年而鰥痛苦若人之天闕弗遂也作賦
以傷之異夫覽者有以增伉儷之重云

歎獨處之邑邑兮憤伊人之我遺情可殺而猶毒境當
歡而復悲人或朝歡而暮息夫何越月而踰時大極運
乎三辰轉寒暑而下馳有歸於無兮盛復于衰猶昧爽

之必暮又安得而怨咨我兮怨夫若人兮曾旭旦而潛
暉飄零日反之萼倏忽蟬蛸之衣川走下而不還露迎
陽而易晞恩已甚兮難絕見無期兮永思我行其野農
民桑者舉按來盭亦在林下我觀于途裨販之夫同荷
均挈荆釵布襦羽毛之蕃鱗介之微和鳴灌叢雙泳連
漪蕙蕙伊蟲蠢蠢伊豸游空穴深兩兩相比何動類之
萬殊必雄雌而與俱物莫失儷以孤處我方踽踽而焉
如我復虛室自淒涼兮心伊鬱兮伊鬱兮將語誰坐丘
牀兮撫嬰兒何所丐沐兮何從仰飴襦袴在身兮昔園
筮跌輦囊附辟兮餘馥歲蕤誠天性之潛感顧重心兮
如疑嗥然有難繼之慕漠然減好弄之姿指遺桂兮能
認溯空帷兮欲歸我入寢宮痛人亡兮物改其容寶瑟

得一

七

偃兮絃柱絕瑤臺傾兮鏡奩空寒爐委灰虛幌多風隙
駟晨轉窻蟾夜通步搖昏兮網黏翡翠芳樽掩兮塵化
型型閱刀尺之餘澤見巾箱之故封翫服儼兮猶具繁
華謝兮焉從想翩僊於是非未僊率與真夢信奇術之
可致嗟此生兮不逢徒注視以寂聽恍神疲而目窮還
抱影以獨出紛百哀而攻中系曰龍門風霜苦別鶴哀
鳴夜銜羽吳江波浪深雌劍一去無遺音悲之來兮憤
予心洵如行波洊浸淫浩緣情而莫極思執禮以自箴
已焉哉莽莽生死悠悠古今乘彼一氣兮聚散相尋或
鼓而興或罷而沉以無涯之情愛悼不駐之光陰諒自
迷其有分徒終怨於匪忱彼蒙莊兮何人子獨累歎而
長吟

何卜賦

余既幼惑力命之說兮身又放而愈疑心回沉其莫曉
兮將取質夫東龜楚人俗巫而好術兮叟有鬻卜而來
思乃招而許之曰嘻人莫不塞有時而通伊我兮久而
愈窮人無不病有時而間伊我兮久而滋蔓吾聞人稟
五行動止有則四時轉續變於所極一歲之早人斯具
舟三月之熱人斯具表極必反焉其猶合符子首圓而
足方予腹陰而背陽胡形象之有肖而變化之殊常經
曰剝極則賁居賁而未嘗剝者其誰否極受泰居否而未嘗
泰者又其誰鶴胡不截是胡不禪葢何罰而蹇踔茲何
功而扶持紛紜恣睢交作年馳似予以奪似信似欺孰
主張之問于子龜卜者曰招我以粗問我以微有天下

得一

八

之是非有仁人之是非在此為美兮在彼為嗤或昔而
成或今而虧君問曷由主張其時時乎時乎去不可邀
來不可逃濼濼兮孰捨孰操董喙之毒苓雞首之賤毛各於
其時而伯音霸其曹屠龍之伎非曰不偉時無所用莫
若履狝作踴之工非曰可珍時有所用貴於斷輪絡首
縻定兮驥不能踰跬前無所阻兮跛鼈千里同步于川
其時在風泌者之吉泝者之凶同藝于野其時在澤伊
撞之利乃稔之厄故曰是邪非邪主者時邪主者命邪
諒淑惡之同出兮顧所丁之若何夫如是得非我美失
非我耻其惡曷思其來曷期姑蹈常而俟之夫何卜為
言訖執龜而起子退而作何卜賦於是蹈道之心一而
俟時之志堅內視群疑猶水釋然

謫九年賦

古稱思婦已歷九秋夫必有是舉為深愁莫高者天莫
濬者泉推已極數無踰九年伊我之謫至於數極長沙
之悲三倍其時廷尉不調行當跋而天有寒暑閏餘三
變朝有考績明幽三見顧堯之民兮亦昏墊而有歎歎
息兮倘佯登高高兮望蒼蒼奕弁之夫我來始黃合抱
之木我來猶芒山增昔容谷水改故坊童者鬱鬱兮涸者
洋洋天覆地生蒼翁兮無傷彼族而居曩之投荒彼軒而
遊昨日衍揚信及澤濡俄然復常稽天道與人紀咸一
償而一起去無久而不還禁無久而不理何吾道之一
窮兮貫九年而猶爾意不可得而知庸詎得而悲苟變
化之莫及兮又安用夫肖天地之形為

蘇符一

九

望賦

邈不語兮臨風境自外兮感從中晦明轉續兮八極鴻
蒙上下交氣兮群生異容發孤照於寸眸驚遐情乎太
空物乘化兮多象人遇時兮不同嗟乎有目者必聘望
以盡意當望者必緣情而感時有待者瞿瞿忘壞者熙
熙慮深者瞠然若喪樂極者冲然無違外徙倚其如一
中糾紛兮若斯望如何其望最樂晞慶宵兮溯阿閣如
雲兮天顏咫尺如草兮臣心踴躍扇交翟兮歲蕤旗外
龍兮蠖略日轉黃道天開碧落凝瑞景於庭樹掬非煙
於殿幕望如何其望且懽登霸岸兮見長安紛擾擾兮
紅塵合鬱葱葱兮佳氣盤池象漢兮昭回城依斗兮闌
干避御史之駟馬逐倖臣之金丸望如何其望攸好宗

萬靈兮越四隩漢帝仙臺兮秦皇海嶠霓衣踴于河上
馬跡窮乎越徼紫氣度關而斐豐神光屬天而昭耀玩
眷眷以馳精聳專專而觀妙望如何其望有形視蠢蠢
兮窮真真楚塞氛惡兮蕭關燧明暈籠孤月角奮長庚
沙多似雪磧有疑城煙雲非女子之氣草木盡王者之
兵審戍柴之虛警破來騎之先聲信有得於風鳥示無
言於旆旌望如何其望且慕恩意萬兮年光度雕輦已
辭兮金屋何處長信草生兮長門日暮後羣華之儻來
仰玄天以自許況復湘水無還漳河空注浚淝枝葉香
餘紈素風蕭蕭兮北渚波煙漠漠兮西陵樹夫不歸兮
江上石子何見兮秦原墓拍琴翻朔塞之音挾瑟拍邯
鄲之路望如何其望最傷侯環玦兮思帝鄉龍門不見
兮雲霧蒼蒼杳杳何許兮山高水長春之氣兮悅萬族
獨含嘆兮千里日秋之景兮懸清光備結憤兮九迴腸
委環拱於白榆惜馳暉於落棠諒衝斗兮誰見伊戴盆
兮何望平聲豈止蘇武在胡管寧淳海送飛鴻之滅沒
附陰火之光彩鶴頸長引烏頭未改恨已極兮平原空
起何時兮東山在永望如何傷懷孔多降將有依風之
感宮人成憶月之歌歌曰

張衡側身愁思久王粲登樓日迴首不作渭濱垂釣臣
羞為洛陽拜塵友

山陽城賦并序

山陽故城遺趾數雉四百之運終於此墟喬孫作賦蓋
閔漢也詞曰

我止行車賈涕于山陽之墟是何蒼莽與慘悴春陵之
氣兮焉如踣昌運於四百舜至尊而伍疋夫有利器而
倒持兮曾何芒刃之足舒懿王迹之肇基暨坤維之再
敷邈汜陽與鄩上况蛇變而龍攫痛人亡而事替終此
地焉忽諸嗟乎積是爲治積非成虐文景之欲處身以
約播其德牙迄武乃獲桓靈之欲從心於昏執其妖焰
逮獻而焚彼伊周不世兮奸雄乘釁而騰振物象灌以
易位彼虛號而陽尊終世殫而事去胡竊揖讓以爲文
嗚乎維神器之至重兮蓋如山之不騫使人得譬乎逐
鹿固健步者所先諒人事之云尔孰云當塗之兆也自
天乱日久矣莫可追陞彼墟兮贊嘻獨遺武兮貽後王
之元龜

秋聲賦并序

十一

相国中山公賦秋声以属天官太常伯唱和俱絕然皆
得時道行之餘興猶有光陰之歎况伊鬱老病者乎吟
之斐然以寄孤憤

碧天如水兮宵宵悠悠百蟲迎暮兮万葉吟秋欲辞林
而蕭颯潜命侶以啁啾送將歸兮臨水非吾土兮登樓
晚枝多露蟬之思夕蔓趨寒蟹之愁至若松竹含韻梧
楸早脫驚綺䟽之曉吹墮碧砌之凉月念塞外之征行
顧閨中之騷屑夜蛩鳴兮機杼促朔鴈叫兮音書絕遠
杵續兮何泠泠虛窅靜兮空切切如吟如嘯非竹非絲
合自然之宮徵動終歲之別離廢井苔冷荒園露滋草
蒼蒼兮人寂寂樹槭槭兮蟲唧唧則有安石風流巨源

多可平六符而佐主施九流而自我猶復感陰蟲之鳴
軒歎涼葉之初墮異宋王之悲傷竟潘郎之么麼嗟乎
驥伏櫪而已老鷹在韝而有情聆朔風而心動眄天籟
而神驚力將疲兮足受細猶奮迅於秋聲

劉夢得文集卷第一

劉夢得文集卷第一

碑

王氏先廟碑

令狐氏先廟碑

劉君遺愛碑

奚公神道碑

八郡開國公王氏先廟碑

唐制五等之有爵服而無山川登于三事得立四廟備物
崇祀以交神明敬先報本以輔孝治有國之令典也維
長慶二年前相國王公始卜廟于西京崇葉里公時鎮
劍南東川草曰臣涯官秩印綬品俱第三請如式以
奉宗廟制是歲仲冬申命長男孟堅祔其主于三

室明年公入為御史大夫復以十一月躬行蒸祭間歲
公出梁州就拜司空禮崇異數廟加祀室大和二年增
新室既成祔顯考于尊位告饗由禮觀之者以為世程
第一室曰儀同豳州別駕府君諱元政以妣博陵崔
氏配第二室曰湖州安吉縣令贈尚書刑部員外郎府
君諱實以妣贈扶風縣太君馬氏配第三室曰朝散大
夫青州司馬贈戶部侍郎府君諱祚以妣贈武威郡太
夫人賈氏配第四室曰温州刺史贈太尉府君諱冕以
妣贈魯國太夫人博陵崔氏配初周靈王太子晉遇浮
丘公化為神僊時人號曰王家其後遂以命氏顯於秦
者王翦三世將秦師子孫分居晉代間東漢有徵君霸
霸孫甲亦號徵君徙居祁縣為著姓故至于今為太原

人自漢涉魏益以熾昌凡十葉至後魏度支尚書廣陽侯同廣陽有二子神念神感神念南奔梁神感北仕齊惟儀同府君廣陽侯五代孫也唐興于太原實從義旗佐成王業故有開府儀同之寵惟刑部府君以功臣子理二邑不躋貴仕故有錫美後大之祥惟戶部府君幼孤以孝聞於鄉曲未冠以文售於有司由前進士補延州臨安縣主簿會詔徵賢良策在甲科授瀛州饒陽尉歲滿遷渭州天台在神都而東畿差重遂由渭南轉河陽適逢建元象神宮甸內吏分董其役因上書切諫繇是名益聞聞元初以大理司直馳軺車聯讞大獄閩禺朔漢所至决平早以纒棘傷生晚成劇恙樂就夷曠故不至大官惟大尉府君生於治平時以文學自奮年十

有五貫然從秋賦明年春升名於司徒又一年玄宗御層樓發德音懸文詞政術科以置髦士府君策最高授太常寺太祝未幾復以能通道德南華冲虛三真經進齋屋尉天寶中歷左拾遺左補闕禮部司駕二外郎屬幽陵亂華遣兵南服因佐閩粵故檢校比部郎中行軍司馬時中丞甫寧江南為吉地二千石多用名德乃以府君牧温州朝廷虛公卿以侯高第及聞永嘉人輟春罷社搢紳間以不淑相弔焉雖位負于道而邁德垂矩後之人得以續承不揚之其儲休啓祐有自云爾生三子皆聰明絕人長曰沼以神童仕至檢校禮部郎中次曰絜以其文仕至國子司業今代郡公實季子也早在文仕藉射策連中咸世其家貞元中德宗聞其名自藍

田尉召入禁中視草厥後三典書命再參內廷由是憲宗器之付以國柄翊贊有道雖冊免常居大僚今年自梁州請覲上思用舊臣爲羽儀遂領太常其公府如故以一心事六君顯官重務靡不揚歷且夫起諸生至三公而心愈卑道益廣出授黃鉞以臨諸侯入服華章以謁家廟追宗極大位血食備多室享全榮而奉昭薦嗚呼公侯之孝歟宜書廟器以視橋公之三鼎其辭曰闕宇神庭遂清而嚴上公之儀四室耽耽犧以潔牲粢以大糝交神尚敬合魄尚氣子姪宗工駿奔奉事副筭侈杖儼恪居次孝孫兢兢執爵而外以裸以濡以伏以興水陸具來羶薌畢登列于園方其器增增乃禴乃嘗敬而追遠二昭二穆孝以尊本瞻瞻几幄蹈蹈堂闈禮成

月二

三

起慕涕落玄衣濡露踐霜誰無永懷不如達者哀與榮偕逢時奮庸誰不得位不如仁人以道爲貴惟公之達兮名以顯親惟公之仁兮德以澡身六朝之清臣一代之全人宜其世家翼翼振振罔不肅祗于廟之門

彭陽侯令狐氏先廟碑

今上元年某月汴州刺史宣武軍節度副大使知節度事汴宋亳等州觀察處置使銀青光祿大夫檢校禮部尚書兼御史大夫上柱國彭陽縣開國伯令狐公西嚮拜草上言守臣楚蒙被恩澤列爲元侯得立家廟以奉常祀制書下其奏于有司於是善相考祥得地于京師通濟里居無何新廟成公以守藩故申命季弟監察御史定卜牲練日越八月丁亥祔饗三室埴墉以尚幽設

幄以迎精禮無尤違神用寧謚第一室曰秦州上邽縣尉諱潛以妣太原王氏配第二室綿州彰明縣令贈吏部尚書諱崇亮以妣贈太原郡夫人河東柳氏配第三室太原府功曹叅軍贈太子太保諱承簡以妣贈魏國太夫人富春孫氏配明年十月公由浚郊以介圭入覲直拜戶部尚書進爵爲侯既辭戎旗得以列侯謁三廟是歲南至上不視朝又得以展時祭先期致齊栗然以敬既齊盡志歆然永思奉其百順陳以具物始躋而虔恭終獻而仇瀾既卒事顧麗牲之石宜有刊紀乃俾冢老授其謀于所知云令狐晉邑也晉大夫魏顓以輔氏之功始封焉其易名曰文國語所謂令狐文子是已其先周文王之昭畢公高之裔畢萬爲晉卿始封于魏自萬

得二

四

至顓蓋四世其後三十七世藍田侯蚪仕拓跋魏爲熨煌郡太守子孫因家遂占數爲郡人藍田之孫熙在隋爲納言惟上邽府君納言之玄孫道克肖而位不至惟尚書府君西州之右族光未耀而德已基惟太保府君子儒以經明居上第調補陽安縣主簿歷正平尉汾州司法叅軍陝州大都督府兵曹終于太原府首掾始以顓經進既仕旁通百家受穀梁子清而婉左丘明國語辨而工司馬遷史記文而不華咸手筆朱墨究其微旨愷悌以肥家信誼以急人德充齒老至獨享天爵故休祜集于身後徽章流乎佳城凡以子貴永澤降命書告弟者始贈尚書祠部郎中再贈禮部尚書三加右僕射四爲今稱先夫人亦四徙封密印纍纍邦族聳慕生三

子皆才彭陽公爲嗣次子從端實肅給今爲檢校膳部
郎中叅河東軍事季子前所謂監察御史今主柱下方
書溫敏而有文綽綽然真令兄弟唯彭陽以詞筆取科
名班叅侍從由博士主尚書牋奏典內外書命遂登樞
衡言文章者以爲冠擁節總戎率身和衆惠于盟津變
風于浚都言方略者以爲能夫浚師喉嚨難治乘叢籍
發寔成習俗莅止五載飲和革心東馬來朝能罷隕涕
問公還期觴必祝之留爲常伯旋命居守汴人聞公之
東近而愈懷翹翹瞿瞿盡西其首言遺愛者可紀焉貴
而率禮老而能慕怵惕乎霜露齊莊乎廟祧睦其仲季
施及鄉黨言孝悌者歸厚焉勒銘于碑以代夷鼎文曰
已狐之孝莫如備物顯顯新廟四阿三室時惟仲月卜

得二

五

用柔日醴醖苾芬牲牲博膾邊魴在堂蕭管在庭孝孫
蒸蒸躬若奉盈低簪委紳薦俎登鉶彤饗交感涕流緣
纓禮以備儀誠以致美祖考來格錫之不祉工祝告訖
退循軒祀乃授風人作詩以紀猗歟彭陽之寵光佐憲
皇穆王西省東臺迭爲侍郎國之大政咨爾平章劾宗
疑旒俾鎮雍丘入爲地官今守東周彭陽之忠厚宜介
福以壽東郊旣釐可復朝右綿綿其胄系于周舊由我
顯起必昌其後大和紀元作廟之首刻碑廟門龍集配
高陵令劉君遺愛碑

縣內之大夫鮮有遺愛在其去者蓋邑居多豪政出權
道非有卓然異績結乎人心決于骨髓安能以而愈思
大和四年高陵人李仕清等六十三人思前令劉君之

德誦縣請金石刻縣令以狀申府府以狀考于明法吏
上言謹按寶應詔書凡以績將立碑者其具所紀之文
上尚書考功有司考其詞宜有紀者乃奏明年庚午詔
曰可今書其章明有以結人心者揭于道周云涇水東
行注白渠驪而為二以沃關中故秦人常得善歲按水
部式決洩有時畎澮有度居上游者不得擁泉而顛其
腴每歲少尹一人行視之以誅不式兵興已還寢失根
本涇陽人果擁而顛之公取全流浸原為畦私開四竇
澤不及下涇田獨肥他邑為枯地力既移地征如初人
或赴訴泣迎尹馬而占涇之腴皆權倖家榮勢足以破
理訴者覆得罪繇是咋舌不敢言吞寃銜忍家視孫子
長慶三年高陵令劉君勵精吏治視人之瘼如燠疽在

得二

六

身不忘決去乃循故事考式文暨前後詔條又以新意
請更水道入于我里請杜私竇使無棄流請遵田令使
無越制別白熾悉列上便耳椽吏依違不決居二歲距
寶曆元年端士鄭覃為京兆秋九月始具以聞事下丞
相御史御史屬元谷實司察視持詔書詣渠上盡得利
病還奏青規中上以谷奉使有狀乃俾太常撰日京兆
下其符司錄妣康士曹椽李紹實成之縣主簿談孺直
實董董之冬十月百眾雲奔憤與喜并口誣手運不屑
藪揆功什七八而涇陽人以奇計賂術士上言曰白渠
下高祖故墅在焉子孫當恭敬不宜以畚鍤近阡陌上
聞命京兆立止絕君馳詣府控告具發其以賂致前事
又謁丞相請以顛血汚車茵丞相彭原公歛容謝曰明

府真愛人陛下視元元無所恠第未周知情僞耳即入
言上前翌日果有詔許訖役仲冬新渠成涉季冬二日
新堰成馭流渾渾如脉宣氣蒿荒漚冒迎耜釋釋開塞
分寸皆如詔條有秋之期投鍤前定孺直告已事君率
其寮躬勞俵之丞徒謹呼奮撥槩而舞咸曰吞恨六十
年明府雪之擿姦犯豪卒就施為嗚呼成功之難也如
是請名渠曰劉公而名堰曰彭城按股引而東千七百
步其廣四尋而深半之兩涯夾植杞柳万本下垂根以
你固上生材以備用仍歲旱沴而渠下田獨有秋渠成
之明年涇陽三原二邑中又擁其衝為七堰以折水勢
使下流不厚君詣京兆索言之府命從事蘇特至水濱
盡撤不當擁者繇是邑人享其長利生子以劉名之君

得二

七

諱仁師字行輿彭城人武德名臣刑部尚書德威之五
代孫大曆中詩人商之猶子少好文學亦以畫干東諸
侯遂參幕府歷尹劇縣皆以能事見陟率不時而遷既
有績于高陵轉昭應令俄兼檢校水曹外郎充渠堰副
使且錫朱衣銀章計相愛其能表為檢校屯田郎中兼
侍御史幹池鹽于蒲錫紫衣金章歲餘以課就加司勳
正郎執法理人為循吏理財為能臣一出於清白故也
先是高陵人蒙被惠風而惜其捨去發于曾懷播為聲
詩今采其旨而變其詞志于石文曰
噫涇水之逶迤漑我公兮及我私水無心兮人多辭錮
上游兮就我澤時逢理兮官得財墨綬葉兮劉君來能
愛人兮恤其隱心既公兮言既盡縣申府兮府聞天績

憤刷兮沉痾痊劃新渠兮百畝流行龍地兮止膏油遵
水式兮復田制無荒區兮有良歲嗟劉君兮去翔翔遺
我福兮牽我腸紀成功兮鐫美石求信詞兮昭懿績

唐故朝議郎守尚書吏部侍郎上柱國賜紫
金魚袋贈司空奚公神道碑

嗚呼有唐清臣尚書吏部侍郎奚公貞元十五年十月
甲子薨于位詔贈禮部尚書太常考行謚曰某是歲曠
月丁酉葬于萬年縣之某原後三十有四年子為諸侯
大夫門戶有煒於是門下生琢石紀德揭于我阡云公
諱陟字勢衡其先在夏為車正以功封于薛下古以降
為譙郡人或因仕適楚復之秦今為京兆人隋唐之際
再世以明經為博士家有賜書曾祖簡亦以文學為太

厚二

八

子司議郎大父乾繹仕至光州刺史烈考諱某有道而
尚晦終徐州司功叅軍贈和州刺史由子貴也天以大
運生萬物而以正氣鍾賢人至和來宅其德乃具公實
具焉幼而擢陵君之秀長而成清廟之器群倫月旦咸
以第一流處之及從鄉賦泉外名太常果居上第明年
詔郡國徵賢良設四科以盡材公居文詞清麗之日授
弘文館校書郎時德宗新即位聲怛虜庭西戎畏威底
貢內附詔諫議大夫崔河圖持節即虜帳以報之使臣
欲感其質寮以自大遂嘿表公為介梅大理評事除書
到門公方為人子不敢許以遠稱病弗果行歸寧壽春
養志盡敬丞相楊炎勇於用才擢為左拾遺奉安輿而
西未幾再集荼蓼居後喪將闋是歲建中四年京師急

變黃屋順動狩于巴梁公徒行間道以歸王所既中月而詔授起居郎充翰林學士創鉅愈遲病不拜職改太子司議郎從大駕迥入尚書爲司金元士且叅權筦之務有頃持愍冊宣恩于薊門將行錫銀朱於青蒲上復命稱旨轉吏部員外郎是曹在南宮爲眉目在選士爲司命公執直筆閱簿書紛拏盤錯一瞬而剖時文昌缺左右丞都曹望重遂轉左司郎中尋遷中書學士又執事者驟公識精以斟酌大政非獨用文飾也會江淮間民被水禍上愍焉將命公宣撫之許以便宜及物赤車所至如東風變枯條其利病復奏咸可轉刑部侍郎時主計臣延齡以險刻責倖而與京兆充相惡以危事中之允坐譴已又逮繫其吏峻繩之事下司寇主奏議者欲

文致而甘心焉公倜然持平挫彼嶽嶽君子聞之喜知道不孤刑曹既清以餘刃兼領選事居一年授權知吏部侍郎又一年即真秩言能審官者本朝有裴馬盧李四君子物論以公娘焉時得疾發癱有國醫方直禁中上促遣如第且勅之曰某賢臣也悉術以治之及有司以不起聞上震悼加等公娶瑯琊王氏石泉公之曾孫友壻皆一時彥士長子某蚤不祿第二子敬則歷太僕少卿今爲濮州刺史兼侍御史中丞賜金紫以課最就加貴秩俾視九卿第三子勣立以詞藝似續登文科歷左補闕今爲尚書刑部郎中第四子只卒進士最小子某咸砥礪纂修宜爲名公家子其邁德垂裕之光乎公少以名器自任及顯達急於推賢視其所卒則在西省

薦權丞相由右史掌訓辭在中銓表揚僕射由地曹郎
綜吏部二公後為天下偉人凡執文章權衡以揣量多
士一人中禁考策詞三在天官第章句披沙剖璞由我
而顯者落落居多惟是風鑒移于大治則鎔範之內無
非祥金嗟乎天不遐其福而孤民望使由庚之什不作
於貞元中惜也初公既薨終詔贈大宗伯後以第三子
在郎位被需澤再追祿至司空故昔之葬儀用常伯而
今之碑制用三公公銘曰

仁鱗智龍為瑞一辰未若君子瑞于人倫惟唐德宗道
類漢宣責實繩下風稜言言公丁斯時藉在雋賢從難
表節執羈而還帝曰汝器黃流瑟然可為大僚左右化
源乃飾王度乃馳輶軒既執刑柄亦操利權陽和熙熙

二

十

貯在顏間守法持正疑如秋山火不侵玉倖臣畏伏鳳
鳴翔烟梟噪低跽帝方倚用天不假年公寐無寤其名
愈遠門人達者赤舄玄衮公居甚卑其德愈尊爾子朝
服駢驅朱輪佳城何在胄貴之里螭首龜趺德輝是紀
嗚乎後人下拜于此

劉夢得文集卷第三
碑

薛公神道碑

許州文宣王新廟碑

崔公神道碑

史公神道碑

唐故福建等州都團練觀察處置使福州刺

史兼御史中丞贈左散騎常侍薛公神道碑

薛在三代爲侯國分于鄒魯間傳世三十有一爲齊所并其公子犇楚錫土田于沛漢末避仇之成都曹魏平蜀從家汾陰遂爲河東臨晉人自奚仲爲夏車服大夫距今數千年乘軒服冕冠世言氏族者署爲關內

甲姓天意若曰始有功於車服錫爾子孫世世有之公諱謩字某曾祖寶胤以名家子且有學行歷尚書郎雍州司馬邠州刺史王父繪有雋材刺三郡金密綿皆以治聞累績至銀青光祿大夫封龍門侯烈考丞矩以文亡害仕至大理丞公幼承前人之覆露補崇文生歲滿得調主簿書早毫之譙苦二邑又尉于東畿之河清貞元中上方與丞相調兵食思得通吏治而習邊事者計相以公爲對乃授監察御史裏行充京兆水運使局居鴈門主穀糴具職慕勇壯且便弓矢者爲榜夫千有餘人隸尺籍伍符制如舟師詔以中貴人護之聲震塞上每發粟汧河北行涉戎落以饋緣邊諸軍及乘漳者雖河塞迴遠必尅期如合符一歲中省費萬計累加侍御

史內供奉賜緋魚袋有司條白其勞入拜殿內史未幾
淮海節將以戎倅缺聞事下丞相御史擇可者僉曰公
政事已試遂授戶部外郎兼御史淮南軍司馬尋轉駕
部郎中錫以金紫遇府遷申命真相趙國公帶中書侍
郎代之公主行臺留務趙公文茵及境視置郵供帳及
郊視將迎部位下車視簾幃器備乃曰信竒才也此不
足以展驥朝廷知之擢為泗濱守既報政就加御史中
丞俄遷福建都團練觀察使閩有負海之饒其民悍而
俗鬼居洞岩家梓筏者與華言不通公兼戎索以治之
五洲民咸悅元和十年某月某日薨于位年六十七贈
右散騎常侍夫人趙郡李氏無兒早世繼夫人隴西李
氏檢校禮部尚書河東節度使說之女子疑為嗣季子

得三

一

茂引以諸侯禮議返葬故里蛾眉原從周也後二十有
三年元日開成疑為平盧從事謹按甲令龔碑石來乞
辭以垂于悠久初公治粟于朔陞愚方冠惠文冠察行
馬軻聆風相厚謂可妻也以元女歸之明年愚入尚書
為郎職隸計司因計相召公來會府行有日矣遇內禪
惟新愚以緣坐左貶聞關外役竟不克面然而公之德
善灌注心耳孝悌為根抵誠剛稊葉之直方為天質禮
讓緣飾之所至藹然繇此道也公初下世故人丞相李
太師誌其墓其略曰弘深莊重幹敏絕人此與游者傳
信之詞也豈誣也哉故作銘曰

何汾瀟淪鼎氣散為昌光凝為賢人常侍之生其
宗孔碩從祖昆弟誥誥三百文館入仕幽龍末光尺本

為階秋然欲翔司會知材績宣朔方邊師方喉俟我羸
糧汧于黃河路出戎疆慕乃勇士卓衣挽航雁索解孤
穹廬在旁虜聞公名憚不敢數安比已南列城相望率
有諸峙皆成金湯入居殿中分巡輦下淮海軍大往為
司馬軍中之治可移諸民乃牧于泗乃廉于閩閩悍而囂
夷風脆急恩信綏之委然如蟄閩方不淑天奪其福公
薨于寢立頰以復天王廢朝贈之金貂莓莓晉原鬱矣
中條大墓舊阡松楸蕭蕭笳鼓以歸德音孔昭

許州文宣王新廟碑

歲在丙辰元日開成許州牧尚書杜公作文宣王廟暨
學舍于允隅革故而鼎新也前年公受社與敏且董淮
陽汝南之師八月上丁釋奠于宣父之室陋宇荒塔不

得三

三

足迴旋已事而歎乃詢黃髮有鄉先生前致辭曰自盜
起幽陵許為兵衝連戰交枰率無寧歲耳悅征鼓不聞
弦歌目不知書不害為智爾來生聚教養起居祖習壹
出於軍容今幸天子憐許民為擇賢侯此人人思治之
時也公曰諾吾當先後之於是元年脩戎律以通衆志
次年成郡政以蠲民瘼季年崇教本以厚民風我言既
從乃卜新宮漢灑水之瀕也城池在東登其枌坎坎其
斧繩之墨之鑿枘枝梧載旣載塗黔烏陵虛寢廟引敞
齋宮嚴闕軒墀相無儼雅清潔門庭牆仞望之生劫外
飾觚稜中設黼幄嚮明當宁用王禮也堯頭禹身華冠
象佩之容取之自鄒魯及門覩奧偶形畫像之嚴取之
自太學尊彝遵豆青黃規矩之器秉周禮也犧牲制幣

薦獻陞降之節遵國章也藏經于童擔斂器于虔櫝詩
筵有位鼓篋有室授經有博士督課有助教指蹤有役
夫灑掃有廟幹公又割隙地爲廣圃時其柔蔬而常菹
百蓄之禦備捨已俸爲子錢推其孳贏而蓋酪缸膏之用
給濟濟莘莘化行風驅家慕恭儉戶知敬讓父誨其子
兄規其弟不遊學堂與撻市同繇是縻勇爵戴鷩冠者
徃徃弭雄姿而觀習禮矜甲冑者知根於忠信服縵胡
者不敢侮逢掖教化之移人也如置郵焉冬十一月許
人以新儒宮成來告且乞辭欲行乎遠也公名棕字永
裕故丞相歧國公之孫歧公弼諧三帝碩學冠天下嘗
著書二百餘篇言禮樂刑政古今損益統名曰通典藏
在堂室副行人間今孝孫聿脩之刊乎事業播乎聲詩

得三

四

懿哉能世其家也禹錫昔年亦歧公門下生四叅公府
近年牧汝州道許昌躬閱其政故不得讓遂銘于麗牲
之碑銘曰

許分韓魏四征之地兵興已還其闕嚶嚶示有儒宮軌
于兵間賢侯戾止思樂泮水俾人嚮學王化之始便地
爰相新規鬱起廟貌思嚴堂皇有煒秩秩禮物祁祁胄
子入于門墻如造闕里春誦夏絃載揚淑聲風于閭閻
浹于郊垆途讓班白家尊父兄與化而遷其猶性成昔
之委巷相詬交侮今逢親戚不道媒語晉之連管誇力
使酒今遇賓安相對拱手曾有泮林鳥革其音許崇學
敷民悅其教鐫丁圭石以志新廟

唐故朝散大夫檢校尚書吏部郎中兼御史

中丞賜紫金魚袋清河縣開國男贈太師崔
公神道碑

太師名倕字某清河東武城人太公望既封于營丘子
及嗣侯伋之孫曰穆伯食邑于崔遂以爲氏後十四世
至秦末東萊侯意如東萊之子伯基始居清河又十五
葉生琰爲魏名臣又九葉生休仕後魏爲七兵尚書七
兵之弟曰寅爲樂安太守公即樂安八代孫始以門子
補鄭州叅軍力行好學於子道以孝聞處伯仲間以友
聞讀易至編絕以精義聞至德中戎羯猾夏王師出征
公少有奇志思因時以自奮乃作伐鯨鯢賦上獻既聞
耳矣果器之會第五丞相以善言利得幸盡付利權始
有蓋鐵使之目慎選僚屬表公爲分轉臨晉縣丞處繁

得二

五

應卒銚刃無頓府罷再遷至太子司議郎韓晉公時爲
戶部侍郎掌邦賦急於用薦公爲監察御史主河東租
庸之務尋轉侍御史充京東平糶使建中初德宗始親
萬機儲精治本有漢宣與我共治之歎謂大臣求可當
良二千石者遂以公帶本官權知袁州刺史暮月有成
詔書顯揚就加直秩益以金紫居無何韓晉公爲丞相
制國用思公前績乃傳召之抵京師授檢校戶部郎中
兼侍御史幹池鹽于蒲修牢益謹衡石煎和既精飴散
乃盈商通而荐至吏懼而循法民不絀綱而國用益饒
歲抄會其所入贏美什百詔下褒其能轉吏部正郎兼
御史中丞且加五等之爵方倚以重任天富其材而不
遐其福享齡六十有五貞元七年某月某日遘疾終于

治所上聞悼之因降詔冊贈鄭州刺史資錢三百萬以備飾終之禮明年某月某日返葬于成周之偃師從世墓也累贈至太師夫人隴西李氏汾州司倉參軍咸一之女生才子六人長曰邠及公卒時已為左拾遺後至太常次曰鄆至太府卿次曰鄆至外臺尚書次曰邠今為廷尉次曰鄆至執金吾季曰邠今為太常卿同中書門下平章事惟夫人姑臧冠族以頻繁組紉輔佐君子為令妻積三十餘年以慈儉忠厚訓誡諸子為賢母二十有三年當永貞初順宗踐祚澤流自葉長子邠時為詞臣草冊書以文當進階遂上疏乞移榮於親優詔允之特封清河郡太君士林聳慕皆自痛其不及邠為太常鄆為大農咸白髮貴綬以奉膳著諸季各以簪裾給

得三

六

事左右愉愉然先意無違言世榮者舉無與比以子貴累封贈至涼國太夫人元和八年二月十六日捐館舍壽七十有九是歲十月某日合祔惟太常及尚書暨今相國皆自中書舍人為禮部侍郎凡五貢賢能書得士百四十有八人言兄弟者許為人瑞崔氏之門六人皆入文昌宮其間三人歷八侍郎統而論之三大卿兩連率二翰林學士一執金吾言冠冕者許為世雄與姑臧李范陽盧世為婚媾入于姻黨無第一流言門閥者許為時表太常二子亦以才能司入尚書璜為吏部郎確為司勳郎其他文孫未登金匱籍者泚泚然魚貫而進文業甚似而孝謹不衰猗歟君子之澤其所從來遠而有光乎開成已未歲七月甲辰相君受詔于明庭始操

國柄仲月奉常有于家禮成起慕悄然永懷曰古者卿大夫廟有鼎彝有碑皆銘之以紀先德也今備位宰相敢不敷前人之耿光乃俾家老條白事功咨于學古者徵其詞尚信也又命宗祝卜柔日告于廟盡誠也儀其備而敬有餘斯謂建禮之君子遂刊勒如式揭于道周銘曰

弈弈四姓之崔為冠瞻其門牆倬若雲漢善積家肥子孫多材如彼稊棟必生徂來太公之後弥二千祀炯如貫珠焯見圖史顯允太師丕承德基構于其堂亦既墜奕生逢艱履戎夏交師獻賦伐叛忠存乎辭兵興事叢飛輓四馳歷踐劇職視屯如夷乃主平糴乃分竹使治粟為邦其道一致蒲實近地益為利泓使車來忠刻弊

得三

七

立程吏廉商通歲倍其贏奏課連最德音褒明就加執法好爵兼榮天賦之才不與壽并生樹德本歿揚淑聲上聞軫懷侑樂為停贈祿之禮侔于公卿万石貽訓根於孝友太丘種德乃稔身後家有公子妻為壽母二十餘年人倫之首六子來侍如龍如虎眾婦來饋維筮及筐佩玉鳴環交響庭戶申申秩秩歡不踰矩昔為甲族今為興門天爵人爵蔚然兩存先德蔭之黯如重雲孕和合粹濯潤本根景亳之原圖書之川陽陵帝壇旁碑迴環卅安其神卅嗣其賢聆德風者拜于碑前

唐故宣歙池等州都團練觀察處置使宣州刺史兼御史中丞贈左散騎常侍王公神道碑
常侍諱質字華卿始得姓自周靈王太子晉負天而倦

時人曰王子因去姬為王氏自秦漢以還世多顯名由今而上十有一代名傑仕元魏為并州刺史子孫因家遂為太原祁人并州六代孫名通字仲淹在隋朝諸儒唯通能明王道隱居白牛谿游其門皆天下雋傑著書於世既歿謚曰文中子文中生福祚為蔡州上蔡主簿上蔡生勉舉士徵賢良皆上第仕至河中府寶鼎即公之曾祖也祖諱怡渝州司戶參軍考諱潛揚州天長縣丞贈尚書吏部郎中公其季子也始文中先生有重名於隋末其弟勣亦以有道顯于國初自號東臯子文章高逸傳乎人間議者謂兄以大中立言弟游方外遂性二百年間君子稱之雖四夷亦聞其名字公性有遠志常自忖度我大名之後不宜無見焉遂於春秋得其公

得三

八

是於禮得之約僑居淝水上躬督穡事善積於已而淮楚間群老多與之游公歉自少無進取意與游者激之曰卿文儒家子篤志如是盍求發聞去聲俾家聲不頽今夫以文字芒洋當世者誰如華卿庸自弃耶入謀于閨門咸以外言為是因決策而西在貢士藉大和內充不以時尚屑意角遂改取初無此心如梗柵生于深林未始自貴而度材者一眇歆然在懷故以不爭而速售既登第東諸侯交辟之從至者記室于嶺南授正字叅謀於淮右進協律郎其後佐許下暨梓潼南梁率為上分官至兼監察御史司憲聞其賢徵入南臺轉殿內歷侍御史改尚書戶部外貲復為知已所薦遷檢校司封郎中攝御史中丞紫衣金章充山南西道節度副使入

爲尚書員部郎中以方雅特立除諫議大夫會宋丞相坐狷直爲非語所陷抱不測之罪大僚進言無益公率諫官數輩日晏伏閣上爲不時開便殿公於旅進中獨感激雪涕居多由是上怒稍解得從輕比公終以言責爲憂求爲虢州刺史宰相惜去又重違誠請增之以兼御史中丞用示異於人也大凡以智謀而進者有時而衰以朴厚而知者無迹而固公雅爲今楊州牧贊皇公所知人不見其迹方在虢略贊皇入相擢爲左曹給事中凡有大官缺必寵薦居數月遷河南尹又未幾鎮苑陵是三者中外所注意不旬歲而周歷之時論不以爲黨河南帝之別京其治尚體度風采而別白區處之宣城國之奧壤其治在來吏惠下獲罷羸訖剽輕而勞

得三

九

徠澄汰之公兩得其道不由一檢率身以儉而素風存任人以誠而群務舉遇中貴人以禮而故態革內潔其志下盡其忠外無以撓於理三者具求政之有裨曷由哉在鎮三載開成元年十二月八日薨于位享年六十三監軍使上言有詔軫悼不視朝贈左散騎常侍明年八月十一日葬于河南府永寧縣洛川鄉史原從舊阡也初公娶于滎陽鄭氏生三女而歿今蓋柎焉一子曰慶存方齒矣猶子前太原府參軍扶執宗長書來請曰扶也蚤孤荷世父常侍之覆露今其嗣幼未任克家姑封琴書司管籥以俟其長竊懼世父之德音不敷思有以垂于後者以誠告于從叔大司農復命曰俞謹齋身石以乞辭無忽余昔爲郎與常侍同列已孰其行實及

讀墓誌即今丞相益州牧趙郡李公之文自稱爲忘形
友其在宣州李公再入相議以第一官處之牢讓不取
羔鴈所禮則河東裴夷直天水趙哲隴西李行方吳郡
陸紹梁國劉蕡博陵崔珣人咸曰得士夫揚州少與也
而見器益州寡合也而見親六從事材不一也而樂用
是足以觀德庸可勿紀焉銘曰

隋有文中紹歟微言當時偉人咸出其門粹氣紆餘鍾
于後昆常侍恂恂文中來孫發源高麓中泳後大蘭牙
茁然秀出叢蒼善不近名其聲日彰行勇於退其道愈
光哲者知之寘于周行以正持憲以文爲郎以和佐戎
以惠臨邦以直司諫以公駁正守于三川頑民底定乃
鎮于宣先馳淑聲邑中娑娑瞻我旆旌明誰詢謀濟濟

得三

十

君子問誰出內潔潔廉士道本乎心暢于四支治本乎
正形于百爲黠吏斂手齊民揚眉江淮藪空夜拚弗施
公卧于齋邦民悽悽公衣陞屋邦民行哭牙璋斯來柳
萋言旋棠樹未老周人慕焉熊耳之陽泱泱洛川佳城
在茲既固且安松楸颺然石馬矯然過者必敬死陵之阡
唐故邠寧慶等州節度觀察處置使朝散大
夫檢校戶部尚書兼御史大夫賜紫金魚袋
贈右僕射史公神道碑

僕射名孝章字得仁本北方之強壯雄朔野其後因仕
中國遂爲陵武建康人曾祖道德贈右散騎常侍封懷
澤郡王祖周洛銀青光祿大夫檢校太常卿兼御史中
丞北海郡王贈太子太保考憲成早以武勇絕人積功

至魏博節度使終于河中晉絳慈隰等州節度觀察使
檢校司徒兼侍中尹贈太保其薨也大臣中書令晉國
公裴氏爲之碑其名益顯公即侍中之元子母曰異國
夫人李氏幼而聰寤父母賢而加愛焉及長好孝遷善
秀出儕輩鄴下諸兒號爲書生元和中太尉頌爲魏師
下令掄材於轄門取大將家翹秀者爲子弟軍列于諸
校之上公獨昌言願効文職大尉深奇之遂假魏大都
督府叅軍長慶三年常山衆叛害其帥沂國公田司徒
於帳下沂公發迹于魏人猶懷之詔命其子布以尚書
授鉞統魏兵問罪于北疆且報家禍布既啓行士氣不
振煖然內潰獨與冗從之旅偃旗而歸百憤攻由卒自
引丈先侍中時爲中軍都知兵馬使兼御史中丞全師

在野闕然推戴之請爲假侯以鎮定中貴人飛駟上聞
穆宗夜召翰林李士章詔書以真侯命之實有魏士從
衆而合權也是歲公自攝官轉本府士曹叅軍兼監察
御史賜朱衣銀印推恩以及子也一旦跪於父母前進
苦言曰臣竊惟大河之北地雄兵精而天下賢士心侮
之目河朔間視猶夷狄何也蓋有土者多乘兵機際會
非以義取今臣家父侯母封化爲貴門君恩至矣非痛
折節礪行彰信於朝廷無以弭識者之譏寤明君之意
節著於外福延于家乘時蹈機必不旋踵言訖泣下數
行父俞母贊天性交感三心既叶萬衆潛化天子聞而
嘉之曰彼真有子乃授檢校太子左諭德兼侍御史充
節度副使累遷至散騎常侍兼御史大夫賜金印紫綬

既貳軍政事如命卿施張損益得以叅決潛革故態人
知嚮方大和二年滄景節度使李全略卒其子同捷竊
據故地詔下以文告弗革遂用大刑先侍中表請率諸
侯使元子以督戰制曰可公承君父之命乃捐其軀一
舉而下平原墜滄壘由是加工部尚書及王師凱旋上
表願一識承明廬允之遂赴北闕下得覲於便殿上日
嚮吾始征滄州議者皆曰彼魏之姻也虜陰為寇謀吾
發使數輩以慎之其還也僉曰爾父瀝款於賓筵爾母
抗詞于簾下願絕姻以立効其經始啓發出於爾心今
滄海砥平策勲之日且貴爾三族命爾父為侍中遷鎮
于近地加爾禮部尚書折相衛潼州為鎮以居之俾爾
一門大榮以誇天下公拜稽首謝父遷讓已爵禮無違

者翌日詔下于明庭人咸曰史氏之寵光古無有也牙
旗碧幢方指東道侍中以帳下生變聞素極而不當歌
而哭迎柩于路仰天長號因葬于洛陽之印山冀國夫
人祔焉寢苦枕塊以所仇同天為大酷未幾詔奉金革
之義起為右金吾將軍累表陳乞有司以違命督之輿
疾即路間歲擢授鄜坊丹延等州節度觀察處置等使
居四年遷鎮于滑一歲入為右領軍衛大將軍旋改右
金吾大將軍又授鉞于邠土孟秋至治所首冬違疾拜
章入覲不克展和鸞帷革之儀薨于靖恭里之私第享
齡三十九當開成三年十月二十日上聞而悼之不親
朝一日贈尚書右僕射明年二月歸葬于洛都夫人琅
邪王氏祔焉繼室深澤縣君博陵崔氏有一子曰煥生

七年而孤僕射之喪自復魄至葬當門戶備祭祀建碑
表皆縣君之能且命其家老具事功來請曰娶不恤家而
憂幼嗣不知其先人之官業乞詞以傳于後也君子以
爲知禮謹書之銘曰

斗極之下崆峒撞氣鍾于侍中孔武且貴奉上致命宜
昌後嗣僕射承之良弓不墜耳頰鉦鼓心悅文字虎穴
之中生此騏驎大和紀元滄景不度子弄父兵跳踉海
孺有隣陰交蝟起雞連詔下薄佞良隅驕然時惟侍中
實統魏師蓄銳未發衆心危疑僕射爲子陳謀畫詞興
言涕零有感尊慈絕姻効節精貫神祇滄波底寧王命
褒之乃遷元侯來鎮近畿乃祚元子別進旌麾一門四
節焜燿當時倏忽變生魏郊紛披喬木雖大育風不知

十三

干雲之臺列缺焚之哀哀孝嗣丁此大酷迎護幃輶葬
于東洛訢天觸地血染纓服禮有金華詔書勅促不遂
枕戈驟膺椎轂雕陰白馬暨于邠谷雖榮王鎮不苟白
祿綺紉之間珪組纍纍如彼晨葩日中而萎有妻名家
有子稚齒行號執禮歸空蒿里洛水之陽循邛之趾尊
卑穆敬幽顯同理舊松新栢示象橋梓刻石紀功垂千
萬祀

劉夢得文集卷第四

碑釋門銘記讚附

曹溪第六祖碑

湘潭唐興寺儼公碑

第一祖新塔記

袁州廣禪碑

蘄州移鐵像記

華藏世界圖讚

成都新修福成寺記

大唐曹溪第六祖大鑿禪師第二碑

元和十一年某月日詔書追褒曹溪第六祖能公謚曰大鑿實廣州牧馬揔以疏聞繇是可其奏尚道以尊名

三

同歸善善不隔異教一字之褒華夷也懷得其所故也馬公敬其事且謹始以垂後遂咨於文雄今柳州刺史河東柳君爲前碑後三年有僧道琳率以其徒由曹溪來且曰願立第二碑學者志也維如來滅後中五百歲而摩騰竺法簡以經來華人始聞其言猶夫重昏之見芻爽後五百歲而達摩以法來華人始傳其心猶夫昧旦之覩白日自達摩六傳至大鑿如貫意珠有先後而無同異世之言真宗者所謂頓門初達摩與佛衣俱來得道傳付以爲真印至大鑿置而不傳豈以是爲筌蹄耶芻狗耶將人人之莫已若而不若置之耶吾不得而知也按大鑿生新州三十出家四十七年而歿百有六年而謚始自蘄之東山從第五師得授記以歸高宗使

中貴人再徵不奉語第以言爲貴上斫行之銘曰
至人之生無有種類同人者形出人者智蠢蠢南裔降
生傑異父乾母坤獨肖元氣一言頓悟不踐初地五師
相丞授以寶器宴座曹溪世號南宗學徒真來如水之
東飲以妙藥差其瘖聾詔不能致許爲法雄去佛日遠
群言積億著空執有各走其域我立真筌揭起南國無
修而修無得而得能使學者還其大識如黑而迷仰見
斗極得之自然竟不可傳口傳手付則礙於有留衣空
堂得者天授

佛衣銘并引

吾旣爲僧琳撰曹溪第二碑且思所以辯六祖置衣不
傳之旨作佛衣銘曰

得四

二

佛言不行佛衣乃爭忽近貴遠古今常情尼父之生士
無一里夢奠之後履存千祀惟昔有梁如象之狂達摩
救世來爲鑿王以言不痊因物乃遷如執符節行乎復
關民不知官望車而畏俗不知佛得衣爲貴壞色之衣
道不在茲由之信道所以爲寶六祖未彰其出也微旣
還狼荒爆俗蚩蚩不有信器衆生曷歸是開便門非止
傳衣初必有終傳豈無已物必歸盡衣乎久恃先終知
終用乃不窮我道無朽衣於何有其用已陳孰非芻狗

唐故衡嶽律大師湘潭唐興寺儼公碑

佛法在九州間隨其方而化中夏之人汨於榮利莫若
妙覺故言禪寂者宗嵩山北方之人銳以武攝武莫若
示現故言神道者宗清涼山南方之人剽而輕制輕莫

若威儀故言律藏者宗衡山是二名山為莊嚴國必有
達者與山比崇南嶽律門以律公為上首律之後雲峯
證公丞之證公之後湘潭儼公丞之星月麗天珠璣同
貫由其門者為正法焉公號智儼曹氏子世為郴之石
姓兆形在孕母不嗜葷葷成童在侶獨不嗜戲其夙植固
厚者歟生九年樂為僧父不能奪其志抱經笥入岫巖
山從名師執業凡進品受具聞經傳印皆當時大長老
我入明門不住諸乘我行覺路徑入智地居室方丈名
聞大千護法大臣多所賓禮嗣曹王臯之鎮湖南請為
人師自是登壇莅事三十有八載由我得度者方有餘
人人持寶衣解纓絡為禮公色受之謂門弟子曰彼以
有相求我我以有為應之凡建寶幢修廢寺飾大像皆

半四

二

極其工應物故也元和十三年九月二十七日中夜具
湯沐剃頭頂與門人告別即寂而視身與色無有壞相
嗚乎豈生能全吾真故死不速朽將有願力耶余不得
而知也問年八十二問臘六十二葬于寺東北隅傳律
弟子中巽道準傳經弟子圓皎身臻與其徒圓靜丈外
惠榮明素存政等欲其師之道光且遠故咨余乞辭乃
作長句偈以銘之曰

祝融靈山禹所治非夫不道不可止中有毗尼出塵土
以律視儼猶孫子登壇人師四十祀南方學徒宗奧旨
幼無童心至齷齒識滅形全異凡死長沙湘潭西幾五
里陶侃故居石頭寺門前一帶湘江水于嗟律虎之名
兮與湘流而不已

牛頭山第一祖融大師新塔記

初摩訶迦葉授佛心印得其人而傳之至師子比丘凡二十五葉而達磨得焉東來中華華人奉之爲第一祖又三傳至雙峯信公雙峯廣其道而歧之一爲東山宗能秀寂其後也一爲牛頭宗巖持威鶴林經山其後也分慈氏之一支爲如來之別子咸有祖稱粲然貫珠大師號法融姓韋氏延陵人少爲儒傳極群書既而歎曰此仁誼言耳吾志求出世間法遂入句曲依僧旻改逢掖而緇之徙居是山宴坐石室以慧力感通故早麓泉涌以神功示現故皓雪蓮生巨蛇摧伏群鹿聽法貞觀中雙峯過江望牛頭頓錫曰此山有道氣宜有得之者乃來果與大師相遇性合神授至于無言同躋智地密

序四

四

付真印揭立江左名聞九圍學徒百千如水歸海由其門而爲天人師者皆脉分焉顯慶二年報身示滅道在後覺神依故山戒香不絕龕座未飾夫豈不思乎蓋神期冥數必有所待大和三年潤州牧浙江西道觀察使檢校禮部尚書趙郡李公在鎮三閩百爲大備尚理信古儒立交修始下令禁桑門取佛以眩人者而於真實相深達焉常謂大師像設宜從本教言自我啓因自我成乃召主吏藉我月入得緡錢二十万秣陵令如符經營之三月甲子新成事嚴而工人盡藝誠達而山神來護願力旣從衆心知歸撞鐘告曰龍象大會諸天聲香如見聞即相生矜明幽同感尚書欲傳信于後遠命愚智之夫上士解空而離相中士著空而嫉有不因相何

以示覺不由有何以悟無彼真諦而得中道者當知爲而不有賢乎以不修爲無也

袁州萍鄉縣楊歧山故廣禪師碑

天生人而不能使情欲有節君牧人而不能去威勢以理至有乘天工之隙以補其化釋王者之位以遷其人則素主立中區之教懋建大中慈氏起西方之教習登正覺至哉乾坤定位而聖人之道參行乎其中亦猶水火異氣成味也同德輪轉異象致遠也同功然則儒以中道御群生罕言性命世衰而寤息佛而大悲救諸苦廣啓因業故劫濁而益尊自白馬東來而人知像教佛衣始傳而人知心法弘以權實示其攝修味真實者即清淨以觀空存相好者怖威神而遷善厚於來者植因以

得四

一

覬福罹於苦者證業以銷冤革盜心於真昧之間泯愛緣於死生之際陰助教化摠持人天所謂生成之外別有陶冶刑政不及曲爲調揉其方可言其言不可得而言也惟四海之大群倫之富必有以得其門而會其宗者爲世導師焉禪師諱乘廣其生容州姓張氏七歲尚儒以俎豆爲戲十二慕道遵壞削之儀至衡陽依天柱想公以啓初地至洛陽依荷澤會公以契真乘洪鍾蘊聲扣之斯應陽燄合熾晞之乃明始由見性終得自在常謂機有淺深法無高下分二宗者衆生存頓漸之見說三乘者如來開方便之門名自分得故生分別道由內證則無異同遂以攝化爲心經行不倦愍彼南裔不聞佛經由是結廬此山心與境寂應念以起教資方而

立因居涉旬而善根者如歸逮周月而帶縛者漸悟以
月倍日以年倍時瘖悖恫開荒憬潛革邑中長者十方
善衆咸發信願大其藩垣法堂四阿股引僧舍身心恒
寂象馬交馳隨其去來皆得利益踰嶺之北涉湘而南
仰茲高山知道有所在此地緣盡修然化俱神歸佛境
悲結人世自趺坐而滅至于茶毗三百有六旬矣爪髮
加長容澤差衰真子號呼圍繞薪火得舍利如珠機者
數百十焉於戲笑圓方之形故寂滅以示盡入菩提之
位穢相以現虛亦猶鳳毛成字麟角生肉必有以異不
知其然於是服勤聞法之士首曰甄外乃率其徒圓寂
道弘如亮如海等相與校彼具役建塔于禪室之右端
從衆也初廣公始生之辰歲在丁巳當玄宗之中元生

三千受具更臘五十二而終終之夕歲直戊寅當德宗
之後元三月既望之又十日也後九年其門人還源以
爲崇塔以存神與建銘以垂休皆憑像寄懷不可以闕
一謬謂余爲習於文者故爾墨足千里以誠相攻大懼其
先師德音與時滄遠且曰白月中黑東川無還颺于余
石傳信百劫彼墮淚之感豈儒家者流專之苛酬斯言
銘示真俗文曰

如來說法徧滿大千得勝義者強名爲禪至道不二至
言無辯心法東行群迷丕變七葉無嗣四魔潛扇佛衣
生塵佛法如線吾師覺者真極道樞丞受密印端如貫
珠一室寥然高山之隅爲法來者百千人俱裔民啞啞
戶有犀渠攝以方便家藏佛書願力旣昔度門斯盛合

爲一乘散爲万行即動永靜故能常定絕緣離覺乃得
究竟生非我樂死非我病現滅者身常圓者性本無言
說付囑其誰等空無礙後覺得之像闕虛塔迹留仁祠
十方四輩瞻禮於斯

夔州始興寺移鐵像記

佛新盡于乾竺而像教東行是法平等故所至爲淨土
是身應供故隨念如降生先是魚復人有以利金爲珍
勒像者重千鈞睥容端相人天兩足是氏卒事而他工
未備故寓于西偏不知其幾年矣寺僧法照瞻禮法信
赤肩白足入諸大城乃至聚落無空過者積十餘年得
信財無量繇是購工以甬巧募徒而畢力四輩增增工
麾以肱中樞外脉陰轉陽動欬如地踴岌如山行大匠

得四

無言尊容嚮明青蓮丞跌金獸捧持藻井花鬘慈籠四
垂邑人膜拜如佛出世法照以願力能就泣于佛前因
持片石乞詞以示後按此寺始於宇文周初瀕江埋庫
皇唐神龍中爲水所壞有波那賴耶國僧廣照浮海而
至頓錫不去遂移於今道場所山曰磨刀嶺曰虎崗其
經始與克脩皆蕃僧是力後之有志者豈無人哉法照
義人姓穆氏年十有五出家依江陵名僧受具肇自身
元二十年甲申歸此寺願宗建有爲凡修大殿立菩薩
大弟子侍佛左右逮長慶癸卯有成其善植德本者歟

毗盧遮那佛華嚴世界圖讚

佛說華嚴經真人妙覺不由諸乘非大圓智不能信解
德宗朝有龍象觀公能於是經了第一義居上都雲

寺名聞十方沙門嗣業是其上足以經中九會皆成華
截俾人瞻禮即色生敬因請余讚之即說讚曰

清淨不染花中蓮

捧持世界百億千

踴出香海浩無邊

風輪負之晝夜旋

大雄九會化諸天

釋梵八部來森然

從昏至覺不依緣

初初極極性自圓

寫之綃素色相全

是色非色言非言

成都府新修福成寺記

益城右門街大逵坦然西馳曰石筍街街之北有仁祠
形焉直啓曰福成寺寺之殿臺與城之樓交錯相輝繡
于碧霄望之如崑閬間物太和四年蜀師非將材不修
邊備南詔君長謀得內空乘隙空入闔于城下或縱火

得四

八

以駭衆此寺乃焚高門修心委爲寒燼如是者年歲帝
命坤維丞相復來山川如近父老相識環視故地寺爲
燹墟載興起廢之歎爰有植因之願乃命呈俸吏以吾
緡錢二十萬爲經營之基自公來思蜀號無事時康歲
稔人樂檀施公言旣光應如決川乃傾囊褚乃出懷袖
勝因化愚慧力攝慳男奔女驟急於徵令匠者度材以
指衆徒藝者運思以役衆技斤鋸磨礪丁丁登登陶者
儲精巧者效能斂自火宅復爲金繩公故鼎新因毀成
研華夷縱觀万目同聳旣告訖役公來慶成雲鮮日潤
輝映前後於是都人舞抃而謠曰昔公去此福成以燬
今公重還福成復完民安軍治亦如此寺庸可勿紀乎
公實聞斯言遂折簡見命謹月而日之時大和其月日

大檀越具官封爵段氏其他發大願者程功重事者自
中貴人及賓寮將吏若僧徒借籍之而刻于石

翰林國史院官書

劉夢得文集卷第四

公



圖書在版編目(CIP)數據

劉夢得文集/[唐]劉禹錫撰.—北京:北京圖書館出版社,
2006.7

(中華再造善本)

ISBN 7-5013-3077-8

I. 劉... II. 劉... III. ①劉禹錫(772~843)—文集②古
典文學—作品集—中國—唐代 IV. I214.232

中國版本圖書館CIP數據核字(2006)第038081號

ISBN 7-5013-3077-8



9 787501 330775 >

書名 劉夢得文集
著者 [唐]劉禹錫 撰

出版 北京圖書館出版社(100034 北京市西城區文津街七號)

發行 Tel:(010)66151313 Fax:(010)66174391

E-mail: Btsfb@nlc.gov.cn

Website: www.nlcpress.com

印刷 金壇市古籍印刷廠

開本 八

印張 一一·七五

版次 二〇〇六年七月第一版第一次印刷

印數 一一二〇〇

書號 ISBN 7-5013-3077-8 / K·1354

定價 三八〇圓

